

ցաւ, ներս մտաւ մի աղջիկ, որ ձեռքով երկու կողմից բռնած, բերում էր մի մեծ պղնձե սինի, որի վրայ դրած էին՝ լաւաշ, պանիր, եղջերոյի սառը միս, մածուն, կարագ եւ լեռնային զանազան բանջարներ: Նա լուռ մօտեցաւ, դրեց սինին հիւրերի առջեւ եւ նոյնպէս լռութեամբ հեռացաւ, առանց աչքերը այս կողմ կամ այն կողմ դարձնելու: Տղերքը բարեւեցին նրան մի քանի սրախօսութիւններով, բայց նա ոչ մէկին չպատասխանեց:

Նա Մարօն էր:

Ամբողջ տասներկու տարի էր, որ չէի տեսել նրան: Որքա՛ն մեծացել էր նա, որպիսի՛ ծանր կերպարանք էր ստացել այն մշտագոարթ, պայծառ դէմքը, որից մանկական ժպիտը երբեք պակաս չէր լինում: Տարիները փոխել էին նրան, փոխել էն դէպի ակեյի գեղեցիկը եւ ակեյի սքանչելին: Մարօն կրկին վերադարձաւ. այս անգամ բերեց մի ահագին խեցեղէն ամանով գինի: Նրա աչքերը հանդիպեցան իմ աչքերին եւ խաղաղ դէմքի վրայ երեւաց խռովութեան նման մի բան: Նա իսկոյն դուրս վազեց, երեւի, հօրը իմացում տալու իմ մասին:

Իմ ընկերները դեռ ինձ «մարդի» տեղ չէին դնում եւ այս պատճառով նրանցից ոչ մէկը չմտածեց ներկայացնել ինձ: Իսկ որսորդը այն աստիճան զբաղուած էր իր հիւրերով, որ կամ չնկատեց ինձ, կամ տեսաւ եւ չճանաչեց: Վերջինը ակեյի հաւանական էր:

– Ու՛ր է, – ձայն տոեց նա, շփոթած ներս մտնելով: – Ու՛ր է Ֆարիատը:

Ես մօտեցայ նրան:

– Ֆարիատ ջան, դո՛ւն ես, քո հոգուն մատաղ, – բացականչեց նա ինձ գրկելով, եւ ուրախութեան արտասուքը ցօղոեցաւ ակեխառն մօրուքի վրայ: – Տղա՛ս, աստօ՛ւ աչքը վրադ լինի, որքա՛ն մեծացել ես դու... Ի՛նչ շնորհալի տղայ ես դարձել... Կարօ, որտեղի՞ց գտար դրան: Ես չէի ճանաչելու, եթէ Մարօն չասէր:

Կարօն կարճ կերպով պատմեց, թէ որտեղ եւ ինչ դրութեան մէք գտաւ ինձ: Որսորդը սկսեց ծիծաղել:

– Ես այդ սպասում էի, որ դու կը փախչես այն անպիտանի մօտից, – ասաց նա, – բայց ափսո՛ս, որ երկար մնացիր այն «դժոխքի» մէջ:

Դժոխք կոչում էր որսորդը տէր Թողիկի դպրոցին: Այդ խօսքը կրկին յիշեցրեց ինձ վաղեմի տանջանքները, որ առժամանակ մոռացութեան էի տուել: